

Headlines

- प्रधानमंत्री नरेंद्र मोदी होरें आखेआ ऐ जे भाजपा लेई सुशासन इक्क दिने दा कार्यक्रम नेई सगुआं उंदियें सरकारें दी पंछान ऐ।
- केंद्री गृह मंत्री अमित शाह होरें आखेआ ऐ जे सी.आर.पी.एफ नक्सलवाद कन्नै निब्बड़ने ते जम्मू-कश्मीर सने पूर्वोत्तर राज्यें च अमन-रमानदारी बहाल करने च सराहनेजोग कम्म करा करदा ऐ।
- दुनिया दे होरनें हिस्सें आंगर जम्मू-कश्मीर च बी क्रिसमस दा त्यौहार धार्मिक जोश-जज्बे कन्नै मनाया जा'रदा ऐ।
- कश्मीर च कड़ाके दी ठंड आहले हालात, श्रीनगर च तापमान सिफर थमां 7.3 डिग्री सैल्सियस हेठ दर्ज कीता गेआ।

<><><><><><>

PM-MP

प्रधानमंत्री नरेंद्र मोदी होरें आखेआ ऐ जे भारतीय जनता पार्टी ताई सुशासन शड़ा इक्क दिनै आहला कार्यक्रम नेई होइए उंदी सरकारै दी पंछान ऐ। होर दुइयें सरकारें कन्नै भाजपा दियें सरकारें दी बरोबरी दा आह्वान करदे होई श्री मोदी होरें आखेआ जे भाजपा दियें सरकारें सुशासन दे हर बिंदु ताई सख्त मेहनत कीती ऐ ते लोकें बक्खी समर्पित रेइयां ना। प्रधानमंत्री होरें एहू गल्ल अज्ज दपैहरी मगरा मध्य प्रदेश दे खजुराहो च केन बेतवा राष्ट्रीय नदी गी जोड़ने आहली देसै दी पहली बड़ी महत्वै ते मते लक्ष्यें आहली परियोजना दा नीहू पत्थर रखने परैत अपने संबोधन च आक्खी। इस कार्यक्रम दा सरिस्ता साबका प्रधानमंत्री भारत रत्न सुरगीय अटल बिहारी बाजपेयी हुंदी 100मीं जयंती दे सरबंध्यै च कीते गेदा हा। उंदी जयंती गी हर बरै सुशासन दिवस दे तौरा पर माया जंदा ऐ। साबका प्रधानमंत्री अटल बिहारी बाजपेयी कन्नै जुड़ी दियें यादें गी सांझा करदे होई श्री मोदी होरें आखेआ जे अटल होर सुशासन ते बेहतर सेवां लेई म्हेशां प्रेरणा दे स्रोत रेय ना। प्रधानमंत्री होरें देसै दी पैहली ओंकारेश्वर तैरने आहली सौर परियोजना दा उद्घाटन कीता ते 1100 अटल ग्राम सुशासन भवने दा भूमि पूजन बी कीता।

श्री मोदी होरें अटल बिहारी बाजपेयी दे चेत्ते च इक डाक टिकट ते सिक्का बी जारी कीता।

<><><><><><>

PM-Swamitva

प्रधानमंत्री नरेंद्र मोदी होर शुक्रवार 27 दिसंबर गी स्वामित्व स्कीम तैहत 50 लख शा बद्द जदाद सरबन्धी कार्ड तक्सीम करंगन। श्री मोदी होर स्कीमा दे लाह्कारियें कन्नै गल्ल कत्थ बी करंगन। इस योजना तैहत ग्रांउ च रौह्ने आह्ले हर जदाद मालक गी औदी जदाद सरबन्धी अधिकारियें दा रिकार्ड सौंपेआ जाग। पंचैती राज मंत्रालय नै आखेआ ऐ जे स्वामित्व योजना जमीं मालकें गी अपनी जदाद दा मुद्रीकरण यानि नकदी च बदलियै दोआर कर्जे हासल करने च मदाद उपलब्ध ते जदाद कन्नै जुड़े दे लड़ाई झगड़े आह्ले मामलें च कमी औग। पंचैती राज सचिव विवेक भारद्वाज होरें आखेआ जे इस स्कीमै आस्तै ड्रोन रायं जांच जरिये तकरीबन 17 ज्हार ग्राएं मोह्डें दा निरीक्षण कीता गेआ ऐ।

<><><><><><>

Shah-CRPF

केंद्री गृह मंत्री अमित शाह होरें अज्ज आखेआ जे सी.आर.पी.एफ नै नक्सलवाद कन्नै निब्बड़ने ते पूर्वोत्तर राज्यें सने जम्मू-कश्मीर च अमन-रमानदारी बहाल करने च सराहने जोग कम्म कीता ऐ। उनें गलाया जे बल देसै च अंदरूनी सुरक्षा ते शांति यकीनी बनाने च महत्वै आहली भूमिका निभा करदा ऐ। गृह मंत्री होरें एह गल्ल सीआरपीएफ मुख्यालय दा दौरा लांदे होई आक्खी। इस दौरान श्री सिंह होरें सीआरपीएफ दे महानिदेशक अनीश दयाल सिंह सने होर दुए अफसरें कन्नै बी मलाटी लाई। सीआरपीएफ प्रमुख होरें श्री सिंह गी बल दे शहीद जवानें दे परोआरें ताई लागू कीती जा'रदियां बक्ख-बक्ख कल्याणकारी स्कीमें बारै जानकारी दिती। गृह मंत्री होरें भाषाई एकता गी निगगर करने आस्तै बल दे रोज आह्ले कम्मकाज च हिंदी गी बढावा देने दे महत्वै पर जोर पाया। सैनिकें दी बेहतर सेहत आस्तै बद्द शा बद्द बाबजरे दे इस्तेमाल पर जोर देने दे कन्नो-कन्नो फौजियें गी आयुर्वेद थमां लाहू हासल करने दा बी आह्वान कीता।

<><><><><><>

Shah-PACS

केंद्री सहकारिता मंत्री अमित शाह होर अज्ज नमीं दिल्ली च 10 ज्हार शा बद्द नमियां बनाई गेदियां मते लक्ष्यें आह्लियें प्राथमिक कृषि डेरी ते मच्छी पालन सहकारी समितियें गी राष्ट्र दे नमित लाया। श्री सिंह होरें राष्ट्री सहकारिता सम्मेलन च नमियां खडेरी गेदियां सहकारिता समितियें गी पंजीकरण प्रमाण पत्र, रपे किसान क्रेडिट कार्ड ते माइक्रो यानि लौह्के ए.टी.एम बी तकसीम कीते। इंदे कन्नै पंचैतें च दोआर कर्जे आहली क्रेडिट सहूलत उपलब्ध होग। माली समावेशन गी बढावा थ्होग ते ग्राएं-मोह्डें च रौह्ने आह्ले लोकें लेई स्कीमें थमां लाहू ठोआना सखल्ला होई जाग।

Diwedi-Grief

चीफ ऑफ आर्मी स्टाफ, सेना प्रमुख जनरल उपेंद्र द्विवेदी ते भारतीय सेना दे आला अफसरें ते जवानें पुंछ जिले च अभियान सरबंधी ड्यूटी दौरान होए दे इक्क दर्दनाक शिडक हादसे च सूबेदार दयानंद तिरकन्नावर, लांस हवलदार अनूप, नायक धाडगे शुभम समाधान, सिपाही निकुरे दिंगबर ते सिपाही महेश मैरीगोंड दी मौत पर गहरा दुख ते बसोस प्रगट कीता ऐ। उनें गलाया जे भारतीय सेना दुखै दी इस घड़ी च सौगी परोआरें कन्नै खड़ोती दी ऐ ते पूरी फौज इंदे कन्नै हमदर्दी रखदी ऐ।

<><><><><><>

Flag March Katra

रियासी जिले दे कटड़ा च मकामी लोकें ते संगठनें पासेआ कीते गेदे 72 घंटें दे बंद दे महेनजर जम्मू-कश्मीर पुलस ते नीम फौजी बलें दे जवानें सने सुरक्षा बलें कनून बवस्था गी बनाए रखने ते तीर्थ यात्रुएं गी उंदी सुरक्षा दा भरोसा दोआने दे मकसद कन्नै फ्लैग मार्च कीता। स्हाटे जिला संवाददाता देविंद्र ठाकुर मूजब एह बंद वैष्णो देवी मंदर दे रस्ते ताराकोट थमां सांझी छत तगर प्रस्तावित रोपवे परियोजना दा विरोध करने आहले मकामी लोकें ते बक्ख-बक्ख संगठनें पासेआ कीते गेदा हा। प्रदर्शन करा रदे लोकें गी डर ऐ जे इस परियोजना कन्नै यात्रा दे रस्ते पर दकानां हटियां ते होर दुआ कम्म करने आहले लोकें दी रोजी रूट्टी पर माड़ा असर पेई सकदा ऐ। अधिकारियें प्रदर्शनकारियें गी आखेआ जे ओ तीर्थ यात्रिएं दियां सेवा गी बनाई रखदे होई अपनियें चैंताएं गी दूर करने आस्तै गल्लबात करन।

<><><><><><>

Christmas-Jammu

पूरे मुल्लै आहला लेखा जम्मू प्रांतै च बी क्रिसमस दा त्यौहार पूरे जोश ते जजब कन्नै मनाया जा'रदा ऐ। पूरी दुनिया दे इसाई क्रिसमस दा त्यौहार यीशू मसीह दे जन्मदिन दे रूपै च मनांदे न। इस दिन क्रिसमस ट्री लाइयै घरें गी सजाया जंदा ऐ-लिश्कने-काकलें दे तारे ते पवित्र पुष्प चक्रे कन्नै क्रिसमस ट्री सजाया जंदा ऐ। इस मौके पर तोहफें दा आदान-प्रदान बी कीता जंदा ऐ। पूरे जम्मू दे गिरजाघरें गी बड़े गै शैल सुनाहकड़े ढंगै नै सजाया गेदा ऐ जित्थे विशेष सेवाएं ते आयोजनें दा सरिस्ता कीता जा'रदा ऐ। गिरजाघरें च सब्भनें धर्मे दे लोक मत्था टेकन जा'रदे न। लेफ्टिनेंट गवर्नर मनोज सिन्हा ते मुख्मन्त्री उमर अब्दुल्ला होरें क्रिसमस दे इस पावन मौके पर लोकें गी शुभकामनां भेंट कीतियां न। जम्मू च क्रिसमस दा त्यौहार एकता ते समाजवेशिता दा प्रतीक ऐ।

<><><><><><>

Weather

कश्मीर घाटी दे मते हारे इलाकें च तापमान झिगला जाने कन्नै सख्त ठंड पवा'रदी ऐ जिस करी पानी दे कई स्रोत ते पानी सप्लाई लाइनें च पानी जम्मी गेदा ऐ। श्रीनगर च कल रातीं घट्टोघट्ट तापमान मनफी 7 अशारिया 3 डिग्री सेल्यिस दर्ज कीता गेआ जिसले के इक रात पैहलें तापमान मनफी 6 अशारिया 6 डिग्री सैल्यिस दर्ज कीता गेआ। मौसम विभाग नै कश्मीर च औने आहले दऊं दिनें च तापमान 2 शा 3 डिग्री होर झिगला जाने दी पेशगोई कीती ऐ। गुलमर्ग गी छोड़ियै कश्मीर घाटी दिएं मतिएं थाहरें तापमान झिगला गेआ। कश्मीर घाटी च इसलै 21 दिसंबर थमां 40एं दिनें दा चिल्ले कलां चला रदा ऐ। मौसम विभाग दे अधिकारिएं दस्सेआ जे कश्मीर घाटी इसलै असमान्य बद्दोबद्द ते घट्टोघट्ट तापमान दी मारै हेठ ऐ। नमें बरे दी आमद पर कुतै-कुतै होली बर्फबारी बी होई सकदी ऐ ते पैहली थमां 4 जनवरी तगर कश्मीर च कुतै-कुतै जां मतियें थाहरें बर्फबारी दी पेशगोई कीती गेई ऐ।

<><><><><><>

Sadaiv-atal Memorial

राष्ट्रपति द्रोपदी मुर्मू, उपराष्ट्रपति जगदीप धनखड़ ते प्रधानमंत्री नरेंद्र मोदी होरें अज्ज साबका प्रधानमंत्री अटल बिहारी बाजपेयी हुंदी 100मीं जयंती मौके दिल्ली च उंदी समाध सदैव अटल पर फुल्ल चाढ़िए भावें भरोची श्रद्धांजलि भेंट कीती। साबका राष्ट्रपति रामनाथ कोविंद, गृह मंत्री अमित शाह, लोकसभा अध्यक्ष ओम बिरला, आंध्र प्रदेश दे मुखमंत्री एन. चंद्रबाबू नायडू ते केंद्री मंत्री ते भारतीय जनता पार्टी दे प्रधान जे.पी नड्डा हुंदे सने नेकें लोकें बी अटल बिहारी बाजपेयी होरें गी श्रद्धांजलि भेंट कीती।

<><><><><><>

Shah-Vajpayee

केंद्री गृह मंत्री अमित शाह होरें अज्ज आखेआ जे सुशासन ते लोकें दी भलाई-बेहतरी बक्खी साबका प्रधानमंत्री अटल बिहारी बाजपेयी हुंदा समर्पण भाव औने आहिलियें पीढ़ियें दी रहनुमाई करदा रौहगा। बाजपेयी होरें गी उंदी सौमी जयंती पर श्रद्धांजलि भेंट करदे होई गृह मंत्री होरें आखेआ जे अटल होरें विचारधारा ते मुल्लें-कट्टें आहली राजनीति बक्खी अपने समर्पण कन्नै देसै च विकास ते सुशासन दे इक्क नमें जुग दी शुरूआत कीती। श्री शाह होरें आखेआ जे साबका प्रधानमंत्री होरें सांस्कृतिक राष्ट्रवाद गी कम करने आहली संस्कृति बनाया ते देसै दी सुरक्षा ते आम लोकें दी भलाई-बेहतरी गी सब्बनें शा उप्पर रक्खेआ। उनें गलाया जे अटल बिहारी बाजपेयी हुंदा जोगदान ध्रुव तारे आहला लेखा बरै तगर देशवासियें दा देश सेवा दी बत्तै पर रहनुमाई करदा रौहगा।

Rajnath-Vajpayee

रक्षा मंत्री राजनाथ सिंह होरें आखेआ ऐ जे साबका प्रधानमंत्री अटल बिजारी बजपेयी भारतीय सियासत दे महान विचारक हे, जिनें अपनी सारी जिंदगी देसै दी सेवा, मान-सम्मान ते विकास लेई समर्पित करी दित्ती। पत्रकारें कन्नै गल्ल करदे होई श्री सिंह होरें आखेआ जे बाजपेयी होरें भारतीय अर्थ बवस्था गी मजबूत करने च बड़ी महत्वै आहली भूमिका निभाई ही।

<><><><><><>